

景明刻本古今逸史

二五

雍錄卷第七

宋新安程大昌著

明新安吳琯校

郡縣

新豐

昭應臨潼

麗山在周爲麗戎國卽藍田山也晉獻公伐戎得麗
姬入秦爲麗邑至漢爲新豐豐者高帝所生之邑也
太上皇思豐欲東歸高帝放寫豐邑荆爲此縣以樂
之其枌榆里社街衢棟宇一如其舊仍徙豐人以實
之不論男女老幼旣至各知屋室所寘雖雞犬混放

亦識其家焉爲其自故豐而徙此故名新豐也

唐爲慶山

又爲昭應本朝爲臨潼

唐新豐縣在府東五十里凡自長安東

出而趨潼關路必由此故項羽東入其軍卽駐鴻門也鴻門在縣東十九里而漢新豐城在縣東十八里也漢文帝指新豐示真夫人而曰此走邯鄲路也言東出而向邯鄲此其趨東之始也

蓮勺

宣帝紀帝數上下諸陵常困於蓮勺如淳曰爲人所困辱也蓮勺縣有鹽池縱廣十餘里其鄉人名爲鹵

中蓮勺

音輦灼

師古曰如說是也鹵者鹹地也今在櫟

陽縣東其鄉人謂爲鹵鹽池也按此所言則漢蓮勺縣者唐之下邳縣也元和志曰下邳東二十三里有蓮勺故城張禹本河內人徙家蓮勺長安志曰當在下邳不當在蒲城也

地名

幽

邠州三水縣有古幽城不窋之孫公劉自慶州南入而邑于此篤公劉之詩曰于幽斯館又曰幽居允荒是皆公劉剏邑之文也史記謂公劉子慶節立國于幽此誤也遷紀公劉度渭取財以建其邑卽本詩之

涉渭而取厲鍛者矣則豳之荒始已屬公劉之世何待其子慶節乃始建立也耶元和志旣指邠州爲公劉所居又指寧州爲公劉之邑則是本祖史記而不嘗參省詩語也邠州北境卽寧之南境本同一州固可通言若質以唐制則邠邑在邠州新平縣非慶州也邠在隋爲豳州至開元例改古文以豳邠字同詔古豳字直書爲邠卽漢扶風之漆縣也

洽陽

廿辛

詩大明日文王初載天作之合在洽之陽在渭之涘文定厥祥親迎于渭造舟爲梁不顯其光又曰纘女

于莘長子維行漢志郃陽應劭曰在郃水之陽師古
曰郃音合卽大雅在洽之陽也元和志曰同州夏陽
縣南有莘城卽古莘國文王妃太姒卽此國之女也
郃陽亦同州屬縣也縣在郃水之陽郃水則水經之
謂瀍水者也別爲一派東流注河不入于渭

畢陌

孟子曰文王生於岐周卒於畢郢岐周旣爲一地則
畢郢之名設嘗兩出亦當同在一地矣書曰周公薨
成王葬于畢則單言葬畢不云畢郢也畢之爲地或
云在渭之北或云在渭之南其主渭北者則漢劉向

言文武周公葬于畢而師古釋之曰在長安西北四十里也長安西北四十里卽咸陽矣故元和志曰咸陽縣治畢原也此皆以畢爲在渭北者矣至其命爲渭南者皇覽曰文武周公冢皆在京兆長安鎬聚東杜中又曰秦武王冢在安陵縣西北畢陌中冢是也人以爲周文王冢者非也周文冢在杜中按杜中卽杜縣之中也杜縣在鎬之東於唐長安縣爲東南二十里此說而果不謬則畢又在渭南也予於是取此數說者而參求之長安有畢陌咸陽又有畢原則原之爲地亘渭南北有之故古記於畢皆著文武葬

地者因畢名兩出而亦兩傳也此其誤之所起也若
以人情言之文都豐武都鎬豐鎬與杜相屬則皇覽
謂文王葬于渭南者其理順也文王既葬渭南則周
公葬畢必附文墓矣劉向傳臣瓚引汲郡古文爲據
曰畢西於豐三十里則地爲渭南甚明安陵有大家
皇覽明指其爲秦文王墓安陵在咸陽則渭北之文冢其
不爲周文而爲秦文亦可據矣又唐令狐亘疏曰周
武葬於畢陌無丘隴之處則武王所葬確在畢陌又
可據矣若夫郢之一地尤難究的安陵有程地者伯
休父於此得姓焉或以孟子之畢郢爲安陵之畢程

故人多信之然其理不然也河南亦有上程聚蓋伯
休父族世之在安陵者隨平王遷洛而聚居此地也
則程自爲程元不爲郢安得謂畢爲程耶設使程可
名郢郢在渭北不與渭南鎬聚相屬自無由兼程畢
郢也至於畢原也者語出左氏曰畢原豐鄆文之昭
也是文王四子分封四國而爲四侯者也畢之與原
旣非一國則畢原之語必因其地有原名畢故名之
以爲畢原而夫原畢兩國未必同在此地也通元和
一志皆李吉甫爲之而周公之墓亦遂兩出一云在
萬年縣西南二十八里一云在咸陽縣北十三里則

是自相殊異可以見其不的矣予故知其展轉生誤皆起於畢名之兩出也

焦獲

六月之詩曰玃狁匪茹整居焦獲侵鎬及方至于涇陽孔疏曰涇陽涇水之北也長安志曰焦獲澤在涇陽縣北亦名瓠同讀也爾雅十數周有焦獲郭璞曰今扶風縣瓠口也鄭國鑿涇水自仲山西邸瓠口是也

涇陽卽池陽也

池陽南至豐鎬僅六七十里而玃狁居焉

安整無畏則其侵入已深而驕肆已甚矣且又旁侵鎬方以及涇陽則雖六月而遂北伐何可緩也此之

爲鎬別是一地非鎬京之鎬詩之下文謂吉父來歸
自鎬而曰我行永久此則外次于鎬而方得來歸之
辭也若元在鎬京則固不得謂我行永久矣況夫鎬
也方也正爲京邑亦不容獫狁侵及乎此也

谷口

在雲陽縣西四十里鄭朴字子真隱于此楊子曰谷
口鄭子真耕于巖石之下而名震于京師卽鄭白渠
出山之處

杜郵

在咸陽縣東二十里卽秦之杜郵白起賜死于此

原书缺页

原书缺页

霸水雜名一

滋 霸頭 漣 霸城 芷陽 霸上

霸水出商州上洛縣西北行至藍田縣境始出谷谷

卽麗山之口亦名藍田山也本名滋水秦穆公改名

爲霸以章已之伯功水至萬年縣東二十里

或云二十里十五里

或云三十里或云在東南皆

是也此水源長占方面多也

漣水始自左方來

而命

是爲合霸之地也水經曰新豐縣西五十里爲

霸城城西十里爲霸水水西二十里爲長安城其地

里甚明也繫地說事者止云霸水不復及漣蓋霸已

包漣故也此地最爲長安衝要凡自西東兩方而入

出嶢潼兩關者路必由之其繫事多故名稱尤雜予

於是率其最而言之凡霸城芷陽霸上霸頭霸西霸北霸陵縣相去皆不踰三二十里地皆在白鹿原上以其霸水自原而來故皆繫霸爲名也別而言之則霸上云者爲其正岸霸水也故旣名上霸亦名霸頭也

漢書顏注云

霸城也者秦穆公之所嘗城又名芷陽也

郡國志曰秦襄公葬芷陽予求之史記秦紀則惠文公四十一年固嘗卽之以葬悼太子矣明年又葬宣太后矣而莊襄二王古皆不記葬處故疑襄王不葬此地也以其悼宣兩墓在焉而漢世文帝霸陵又適在此故世人誤取文帝之陵以名秦之霸城也秦時

未名此地爲陵也高帝入關之初駐軍于此史書其地止名霸上不名霸陵則可驗矣

霸水雜名二

峽關戲水

黃山鴻門

軹道霸門

高帝入關之路自南陽

鄧州

入武關

商州

而叩峽關

踰黃山則藍田縣正爲來路已而自南徂北至霸上

立屯故其屯在長安正東也秦王子嬰出降軹道者

在長安城東十三里也高帝軍至霸上則遂度霸水

西向以趨咸陽子嬰自咸陽迎降是從中渭橋渡渭

至長安東北而遇漢軍故軹道爲降漢之地也子嬰

已降高帝西入咸陽欲遂止居之因樊噲諫乃始還

軍霸上而閉關以絕山東入雍之路項羽在河北聞之遂以黥布輩東上破關而入屯軍于戲則自正東而來也

戲水在新豐縣東二十五里

羽之既至戲水也欲攻高帝

項伯夜馳以告仍又夜馳以去高帝詰朝自往會羽則羽時已踰戲而在鴻門矣鴻門也者麗山之北十里而新豐之東十九里也地有阪橫亘大道而中鑿隧路以爲門徑故曰鴻門也其迹尚在不知何世立此關隘也郭緣生從劉裕入長安記其所聞名述征記緣生或云延生其語轉耳實一人也緣生道聽塗說不及詳審乃曰高帝自霸門而至鴻門夫霸門者